


欽定熱河志

欽定熱河志卷六十

建置沿革六

遼



遼

遼為中京道大定府、恩州、惠州、高州、武安州、利州、榆州、潭州、北安州，兼得澤州地，興中府、安德州、川州、建州、兼得來州、隰州、宜州地，上京道臨潢府地，饒州、徽州、成州、松山州地。

今承德府本境，為北安州及澤州之灤河縣地。灤平縣為北安州地，其西境為奚王府地。豐寧縣為北安州利民縣，其西境為奚王府地。平泉州為大定府大定縣、長興縣、勸農縣、富庶縣、文定縣、升平縣、歸化縣、金源縣，恩州、恩化縣，其南境兼得澤州、神山縣地。赤峰縣為高州三韓縣，松山州松山縣，其北境饒州長樂縣、臨河縣、安民縣地，臨潢府臨潢縣、定霸縣、保和縣、潞縣、宣化縣地。建昌縣，南境為利州阜俗縣，潭州龍山縣，榆州和衆縣、永和縣，東南境兼得隰州之海濱縣及來州地，北境為惠州惠和縣兼得高州之三韓縣地。朝陽縣為興中府興中縣、營邱縣、象雷縣、閭山縣，安德州安德縣，川州宏理縣、咸康縣、宜民縣，建州、永霸縣、永康縣，徽州、成州同昌縣，武安州沃野縣，其西北境為大定府之神水縣，東境兼得宜州之宏政縣。

《遼史·地理志》

中京大定府，漢末步奚

步奚據《元一統志》當作部奚。

居之。魏武北征，降者二十餘萬，去之

松漠。其後拓拔氏建牙於此，當饒樂河水之南，溫榆河水之北。唐太宗伐高麗，駐蹕於此。部帥蘇支從征有功。奚長可度率衆內附，為置饒樂都督府。咸通以後，契丹始大，奚族不敢

復抗。太祖建國，舉族臣屬。聖宗嘗過七金山、土河之濱，南望雲氣，有郭樓闕之狀，因議建都。統和二十四年（二），五帳院進故奚王牙帳地。二十五年，城之，實以漢戶，號曰中京，府曰大定。有七金山、馬孟山、雙山、松山、土河。統州十、縣九。

按：遼有兩中京，其一在鎮州，

今正定府。

太宗大同元年南征時所立，《五代史》載世宗於

中京即位者是也。未幾，入於北漢。其一為聖宗所建之大定府，即元之大寧路，明初之大寧衛，在今平泉州治東北一百八十里，喀喇沁扎薩克公旗境，今尚稱為大寧城，蒙古稱為察罕蘇巴爾罕城。大定府屬之大定、長興、勸農、富庶、文定、升平、歸化、金源諸縣，俱在今平泉州境，說詳後。

又按：《遼志》稱中京大定府，拓拔氏建牙於此。拓拔氏即係元魏，自西晉末為代公，進封代王。及道武稱帝，其所居之地，去此絕遠。據《元一統志》，奚匿松漠間，歷晉不敢復出，元魏時其部族始於此建牙帳，是建牙者乃奚之部族，非即指拓拔氏，此《遼志》之誤也。《志》又稱唐太宗駐蹕於此。太宗之伐高麗，道出營州，經臨渝關。唐之營州為今錦州府全境，及建昌縣、朝陽縣之東南境，臨渝關即今之山海關，亦不應遠出於奚地。又部帥蘇支《唐書》作蘇文，奚長可度《唐書》作可度者，《遼志》傳訛頗多，蓋未盡可據也。

又按：《遼志》於諸地沿革，援引漢縣，率多影響。如以大定府及富庶縣、恩州，為漢新

安平縣地，漢新安平縣屬遼西郡，為封大水、龍鮮水入海之處，距海甚近，當在今灤州西界。詳見《建置沿革二》漢縣辨證下。以龍山縣為漢交黎縣地，漢交黎縣屬遼西郡，為渝水下流入海處，當在今臨

榆縣及寧遠州界，詳見《建置沿革二》漢縣辨證下。以長興、勸農二縣為漢賓從縣地，漢賓從縣屬遼西郡，後漢分屬遼東屬國，與徒河、無慮諸縣相接，當在今錦州府界。以榆州

為漢臨渝縣、驪成縣地，漢臨渝縣屬遼西郡，後漢併象縣入臨渝，其地南濱海。臨渝縣有渝水，為渝關所得名，當在今臨榆縣界。漢驪成縣屬右北平郡，有大碣石山，當在今灤州南界。以榆州所屬

之永和縣為漢昌城縣地，漢昌城縣屬右北平郡，《水經注》新河故瀆逕昌城縣故城北，當與海陽縣相接，在今灤州西南界。以澤州灤河縣為漢土垠縣、徐

無縣地，漢土垠、徐無二縣皆屬右北平郡。《水經注》庚水逕徐無縣故城東，巨梁水逕土垠縣故城東，並在邊內與鮑邱水下流相近。徐無縣當在今遵化州西界，土垠縣當在今豐潤縣東界。以北安州利民縣

為漢女祈縣、且居縣地，漢女祈、且居二縣皆屬上谷郡。《水經注》于延水逕且居縣故城南，陽樂水逕女祈縣故城南，並在今宣化府境。且居縣當在今宣化縣東界，女祈縣當在今龍門縣東界。皆顯然舛

誤。其餘若以松江縣為漢文成縣地，以閭山縣為漢且慮縣地，亦並無確證。其所引唐某

州某縣，如以惠州為唐歸義州地，以武安州為唐沃州地，以高州為唐信州地，以川州為

唐青山州地，以金源縣為唐青山縣地，以榆州為唐黎州地，以和衆縣為唐新黎縣地，以

永康縣為唐昌黎縣地，皆唐羈縻州縣之名，當其時多屬僑治，並無疆域。《遼志》所列，

未免出於臆撰。今悉從刪略。

大定縣 白雲故地，以諸國俘戶居之

按：大定縣近附府治，即在中京城內。《清類天文分野書》曰：遼建中京，置大定赤

縣。

長安 當作長興。縣以諸部人居之。

按：長安縣，《金史·地理志》作長興，而不言更名，《元志》亦同。蓋《遼史》字

訛。《一統志》原本謂長興廢縣，在故大寧地，而不言其方向。《九邊圖》又謂縣在馬孟

山西。《九邊圖》誤指馬孟山廣袤千里，故稱南惠和，西長興，北全寧，皆未足為據。詳見山門。今考遼長興縣至元始廢。《元一統志》曰：遼既建中

京，置長興為赤縣，蕃漢流民，雜居其間，故其習俗不同。元中統二年，省入大定縣，

後改為大寧。又曰金北京大定府治大定、長興二縣，乃知大定、長興並為府治，猶之南

京析津府治析津、宛平二縣，西京大同府治大同、雲中二縣，蓋京縣之制如是也。大定

與長興同在中京城內，大定縣治當在府南，長興縣治當在府北，並在今平泉州境。考

《金志》於長興縣及三韓縣即高州，金廢高州，但存三韓縣。皆注有塗河據《元一統志》：塗河即今土河，亦名老河，詳見水門。知長興縣境與高

州相接。高州在中京之北。元時，大定縣既併長興之後，距高州界一百五十里，則長興

未併之先，必在高州之南，大定之北矣。《方輿紀要》謂長興縣在大寧衛南者誤。

勸農縣 開泰二年，析京民置。

按：遼勸農縣至金即廢。《元一統志》謂金析其地屬長興縣。是勸農縣當與長興縣接

壤，並在中京之北，為今平泉州西北境。《方輿紀要》謂勸農縣在大寧衛東南者，亦未可

為據。

富庶縣 開泰二年，析京民置。

按：《清類天文分野書》曰：遼以其地沃壤，置富庶縣。人多力田，比屋豐富，故

以為名。《方輿紀要》富庶縣在大寧衛東，《一統志》原本亦同。據《元一統志》，富庶縣

東北至金源，元之富庶兼有文定、升平、歸化縣地。知遼縣當在大定府之東北，金源縣

之西，為今平泉州屬喀喇沁右翼旗東北境。若《九邊圖》又謂縣在白狼山東。白狼山左〔三〕建昌縣屬喀喇沁

右翼旗東三十里。富庶縣本屬大定府，不應遠出今建昌縣之東南境，其說亦無據。

文定縣 開泰二年，析京民置。

按：遼文定縣至金即廢。《方輿紀要》文定縣在大寧衛東南。

升平縣 開泰二年，析京民置。

按：遼升平縣至金即廢。《方輿紀要》文定縣南為升平縣。

歸化縣

按：遼歸化縣至金即廢。《方輿紀要》歸化縣亦在大寧衛東，文定、升平、歸化三

縣，俱當在今平泉州東境。

金源縣 開泰二年，析京民置。

按：《方輿紀要》金源縣在大寧衛東。《一統志》原本謂在喀喇沁右翼界，《九邊圖》又謂

縣在大青山西。據《元一統志》，金源縣東到興中州一百里，西到大寧路二百里。元興中州

即遼興中府，大寧路治即遼大定府。知遼縣在大定府之東、興中府之西，為今平泉州屬喀喇

沁右翼旗最東境。《元一統志》又謂金源縣東至興中州界青山嶺二十里，興中州西至金源縣

界青山嶺八十里。青山嶺又稱青巒嶺，考元元統三年，興中州青巒嶺《平治道塗碑》見藝文門有

『鄰封金源』之語，知青巒嶺乃金源與興中東西交界處，青巒嶺在朝陽縣屬土默特右翼旗西北一百八十里，屬建昌縣。蓋今建昌縣。

青巒嶺以西，即平泉州東界，為金源縣地，正當中京之東。《武經總要》謂自中京東至營州界

青山嶺一百七十里，與此相合。《九邊圖》謂金源在大青山西者，亦即指青巒嶺也。

神水縣 開泰二年置。

按：遼神水縣至金時改屬錦州。《一統志》原本以神水故城列入錦州府錦縣下，蓋據

《遼志》神水縣本漢徒河縣地，並引《元史·穆瑚黎舊作木華黎，今改正。傳》為證。然考穆瑚黎取大

定府時，降將張致據錦州以叛，陷興中府。穆瑚黎進兵臨興中，先遣烏葉爾舊作吾也而，今改正。攻

溜石山。又遣蒙古布哈舊作蒙古不花，今改正。屯永德縣即遼安德縣。東，候賊來援，斷其歸路。張致遣兵援溜

石，蒙古布哈引兵趨之，並馳報穆瑚黎，夜半疾馳，遇於神水縣東，夾擊之，遂拔開義

縣，進圍錦州。當日張致之兵本從錦州而西，其交戰在神水，而別屯永德以斷其歸路，

則神水縣之在永德以西可知。《元一統志》謂溜石山在金源縣西南四十里，來援溜石而必

道經神水，則神水縣之在金源縣東南可知。舊《錦州府志》亦謂永德城西北去神水城五

十餘里，永德城在今朝陽縣屬土默特右翼旗界，見後安德州條下。則神水之在永德以西者，亦當在

朝陽縣境。蓋大定府所屬之縣金源東南即為神水，為府之最東南境。

曾公亮《武經總要》中京舊鮮卑之地，在饒樂府西南，本奚王國牙帳之地，南距古北口，

北距潢水，東即營州。千餘里皆其境土，後為契丹所併，築宮室城垣，建為中京，號大定府。

東至營州

即興中府，在今朝陽縣屬土默特右翼旗境。

界青山嶺一百七十里，西即山後儒州

今宣化府延慶州。

界，東南至建州

在今建昌縣屬喀喇沁左

翼旗境。

二百三十里，南至幽州

今順天府。

一路由松亭關，一路由古北口，各九百里，北至上京

今巴林旗。六

百九十里。

按：此為中京所屬州、縣之全境。其能遠接山後儒州界者，蓋中京之西境為北安州，

自北安州以西，為奚王府。奚之故地，本千有餘里，並隸中京，故約略言之耳。《武經總

要》所紀諸州，皆據《契丹圖經》《皇華四達記》諸書。雖異域傳聞間有未確，然其四至

道里，可備參考，亦附列卷內。若《方輿紀要》所載各州、縣方位，多係約略之詞，別

無證據，不盡取憑焉。

《遼史·地理志》

恩州懷德軍。

太宗建州，開泰中以渤海戶實之。初隸永興宮，後屬中京，統縣一。

恩化縣

開泰中，以渤海人戶置。

《武經總要》

恩州本烏桓舊地，南至中京六十里，西至馬孟山六十里，西北至漫頭山三十

里，北至宜坤州

《遼史》作儀坤州，屬上京道。

五十里，西南至高州百二十里。

按：遼恩州至金即廢。《方輿紀要》恩州城在大寧衛西南，與《武經總要》南至中京

之文不合。考《金史·太祖紀》天輔六年，克高、恩、回紇三城，進取中京，是恩州與高

州相近，亦當在中京之北，為今平泉州喀喇沁右翼旗北境。《元一統志》謂金天眷二年，

廢恩州為恩化鎮，入大定縣，其故城為傳舍。蓋恩州本與大定縣接壤，故金時以州省入

耳。至《武經總要》謂恩州北至宜坤州，考恩州至中京僅六十里，南近中京，且高州尚跨恩州之北，是恩州之地未必能直接上京道境，所云北至宜坤州者誤。

《遼史·地理志》

惠州惠和軍。太祖俘漢民數百戶免廢山下，創城居之，置州。屬中京。統縣一。

惠和縣

聖宗遷上京惠州民，括諸宮院落帳戶置。

《武經總要》

惠州在鮮卑之地。景德初，契丹侵河北德清軍，失守，俘虜人民，於此置城居

之。城方二里，至低小。城內有瓦舍、倉廩，人多漢服。東至新州即武安州百三十里，西南至

中京百二十里，南至建州二百三十里，北至潢水石橋，至高州百五十里。遼高州在惠州之西，由惠州至高州不應至潢水石橋，當是北

至潢水石橋若千里，西北至高州百五十里。刊本誤脫字。

按：遼之惠州與元之惠州非一地。元惠州為遼澤州地，而遼惠州至金即廢。《方輿紀

《要》惠和城

即惠州治。

在大寧衛東北百里老兔麋山，在今赤峰縣屬翁牛特左翼旗東北四十里，

惠州當與之相近。《元一統志》惠和縣東南到金源縣九十里，西南到本路一百五十里。元

之惠和即仍遼舊，知縣在大定府之東北，金源縣之北，為今建昌縣北敖漢旗境，今敖漢

西之博羅科廢城即惠州故城也。《元一統志》謂惠和縣西至大寧縣界，塗河今土河即塗河自

喀喇沁右翼旗東北，流入敖漢西境，知自土河以東為惠州地矣。

《遼史·地理志》

武安州

太祖俘漢民居木葉山下，因建城以遷之，號杏塌新城。復以遼西戶益之，更曰新州。統和八年改今名，屬中京。統縣一。

沃野縣

《武經總要》 新州本契丹國之地。東至徽州二百里，西至惠州百三十里，南至霸州百里，北至永州三百七十里。

按：《清類天文分野書》曰：遼太祖俘漢民散居，以其地不可耕殖，因建城池以遷

之。《方輿紀要》武安州城在大寧衛東北二百里。《一統志》原本武平廢縣金武平縣即遼沃野縣，為武安州治。在

故大寧城北，然惠州已在大寧東北，武安州治更在惠州之東，不得但云在大寧北也。至

於木葉山乃遼始祖廟所在，當土河與潢河二水合流之處，為遼之永州。今喀爾喀左翼旗

地，在奈曼旗東北境外。《遼志》既稱建新城為新州，以別於永州之舊城，則武安州自當

在永州以南。《元一統志》武平縣，南至興中州，西至惠和縣。元之武平縣即遼武安州，

知州治當在惠和縣之東，興中府之北，為今朝陽縣屬奈曼旗境。

《遼史·地理志》 利州 本中京阜俗縣。統和二十六年置州，屬中京。統縣一。

阜俗縣 唐末，契丹漸熾，役使奚人，遷居琵琶川。統和四年置縣。初隸彰愍宮，更隸中京。後置州，仍屬中京。

《武經總要》 利州承天后所建。東至建州百二十里，東北至建州百一十里，西南至蘭州 《遼志》中京道

諸州中無蘭州之名，惟《金志》利州龍山縣下有蘭州寨。考遼之州縣至金時廢為鎮寨名者甚多，當是遼本置有蘭州，金廢為蘭州寨。《遼志》失載。六十里，南小凌河路至平州五十里，西北至

中京百五十里。

按：《方輿紀要》，利州城在大寧衛東南。《一統志》原本謂在喀喇沁左翼東北二十

五里，近寧遠州邊外。城西有三塔，土人亦名古爾班蘇巴爾罕城。據《元一統志》，利州

南至龍山縣，北至富庶縣，西至和衆縣。知在富庶縣之南，龍山縣之北，和衆縣之東，當大定府東南境。又考元至元二十四年《利州長壽山玉京觀地產碑》詳見古迹及藝文門。長壽山在今建昌縣南境，詳見山門。則利州故城當在今建昌縣南境，縣治東北七十里。土人為三大城子，亦名小三座塔，正當中京之東南，在喀喇沁左翼旗北百里，所稱左翼東北二十五里者誤也。

又按：《遼志》以利州為統和二十六年置。《金志》及《元一統志》皆以為統和十六年，又《元一統志》載利州軍名曰永昌，開泰元年置，領阜俗縣。《遼史》未詳。

《遼史·地理志》

潭州，廣潤軍。

本中京之龍山縣，開泰中置州，仍屬中京。統縣一。

龍山縣

開泰二年，以習家寨置。

按：潭州龍山縣之里至，《武經總要》未詳。《方輿紀要》潭州城在大寧衛東。《一統志》原本，龍山故城即潭州治。在喀喇沁左翼西南八里，大凌河之旁，距故利州約六十里，俗呼喀喇城。《元一統志》龍山縣，東北至利州，西北至和衆縣。知在利州之西南，和衆縣之東南，與喀喇沁左翼西南八里之說相合。《元一統志》又謂南至撫寧縣界冷口，西南至遷安縣。則自今永平府冷口邊牆以外，建昌縣南境，為龍山縣地也。

《遼史·地理志》

榆州，高平軍。

太宗南征，橫帳解里以所俘鎮州民置州，開泰中沒入，屬中京。統縣二。

和衆縣

永和縣 統和二十年置。

《武經總要》 榆州，隋臨榆宮之地，北控營、平，歷代置關戍守。契丹置州。西北至中京百

七十里，西至招延州 招延州一作招遙州。《遼史》未載。 四十里。

按：《方輿紀要》和衆城 即榆州治。 在大寧衛東。《一統志》原本謂在故大寧城東南。《元

一統志》和衆縣，東至利州，東南至龍山。知在龍山縣之西北，利州之西，今建昌縣治

西北二十五里，地名小城子，與大城子之為利州故城東西相直，即為和衆故城。其西北接

平泉州，屬喀喇沁右翼旗界，正當中京之東南。若《九邊圖》謂縣在白狼山北者，其說

無據。又考遼榆州領縣凡二，和衆縣即為州治，其永和縣至金即廢，《方輿紀要》謂在榆

州西南，其故址亦無可考。

《遼史·地理志》 澤州，廣濟軍。

太祖俘蔚州民，立寨居之，採煉陷河銀冶。隸中京留守司。開泰中置澤州。有松亭關、神山、九宮嶺、石子嶺、灤河、撒河。屬中京。統縣二。

神山縣 神山在西南。

灤河縣 屬永興宮。

《武經總要》 澤州，松亭關北遼澤之地，東至利州百里，北至中京百里，西至北安州二百

里，南至平州二百五十里，西南至松亭關二百五十里。

按：遼澤州治神山縣，縣以山名。《遼志》謂山在縣西南。考神山在今平泉州治北，

當時縣治又在神山東北，近倚州治。是遼澤州城當在今平泉州治北，喀喇沁札薩克公旗

界。自是以南，至邊城外，皆為神山縣地。其州屬西南之境，所屆頗遠。《金史·太祖紀》既取中京，遂下澤州，旋降北安州。是中京之南，即澤州。澤州之西，即北安州。今平泉州屬南境，及承德府東南境，皆澤州地也。灤河縣，以河得名。灤河逕承德府治，南沿平泉州治西境，入潘家口。其澤州境內之撒河，由平泉州治西南境入龍井關，會灤河，知今承德府治東南，平泉州治西南，至邊城以外為灤河縣境。

《遼史·地理志》

高州。

開泰中，聖宗伐高麗，以俘戶置高州。有平頂山、樂（匹）河。屬中京。統縣一。

三韓縣

辰韓為扶餘，弁韓為新羅，馬韓為高麗。開泰中，聖宗伐高麗，俘三地之遺人置縣。戶五千。

按：三韓之名，始見於《後漢書》，稱其有七十八國，若高州所屬之縣，乃因三韓遷戶而置，故取以為名，非即三韓故地。

《武經總要》高州，契丹收新羅諸國，俘虜人民，置州以居之。仍置倚郭一縣，以三韓為名，南至中京百四十里，東南至恩州五十里，西北饒州六十里。

按：《方輿紀要》高州城在大寧衛北二百里。《一統志》原本謂在故大寧城西北。據

《元一統志》，高州南至大定縣，西至松山州。元之高州仍遼舊，知在大定縣之北，松山州之東。《元一統志》又稱東南到惠和縣，惠和北至高州，是高州東北境，跨越惠州惠和縣之北，在今赤峰縣南境，迤東至建昌縣最北境，皆高州地。又考《遼志》，高州有樂

河，即饒樂水。即今之英金河，在今赤峰縣屬翁牛特境。又《元一統志》塗河，自大寧縣流至東

北入高州，金王景先《集賢洞碑記》謂高州南壓塗河。今土河即塗河。自喀喇沁右翼旗東北流逕翁牛特左翼旗之南境，敖漢旗之西北境，會英金河。知今翁牛特境、敖漢西北境，英金河之旁，喀喇沁土河以北，皆高州地也。

《遼史·地理志》

松江當作松山州，

勝安軍。

開泰中置，統和八年省，復置。屬中京。統縣一。

松江

當作松山。縣。地邊松漠，商賈會衝。開泰二年置縣。有松山川。

按：松江州，《遼史·聖宗紀》作松江州。金、元史《地理志》並稱遼置松山州。《遼

志》作松江者，蓋字訛。至遼聖宗開泰年號，本在統和之後，而《志》云開泰中置，統

和八年省，其叙次顛倒失實。《遼志》統和八年七月，省州及縣，以其民分隸他郡。開泰

二年二月，詔以松山州為松山縣，是遼初已先置有松山州，統和時併省，至開泰時復置

也。松山州、松山縣之里至，《武經總要》未詳，《方輿紀要》松州城在大寧衛西北，《一

統志》原本亦同。松山州至金時，曾降為縣，改隸高州，必與高州相接。《元一統志》松

州，東至高州，西至興州，元松州即遼松山州，知在高州之西，興州之東，為今赤峰縣

屬翁牛特右翼旗境，正當中京之西北。《元一統志》又謂松州東南二十里有遮蓋山。考遮

蓋山在今翁牛特右翼旗南三十里，松山州當在其北。

《遼史·地理志》

北安州，興化軍。

唐為奚王府西省地。聖宗以漢戶置北安州。屬中京。統縣一。

利民縣

《武經總要》 北安州，後魏置安州，築城在幽州之北，正當松漠之地，今建為北安州。墨蚪嶺、牛山、會仙石、柳河，皆在其境東北。至中京二百五十里，西南至古北口二百八十里，南至幽州二百五十里。

按：《金志》興州本遼北安州興化軍興化縣。又有利民縣，承安五年以利民寨升，泰和四年廢。蓋以興化為遼之舊縣，而以利民為金所增置。《遼志》有利民縣而無興化

縣，與《金志》不合。考遼北安州治利民縣，據《武經總要》在古北口東北二百八十里。

金興州治興化縣，在古北口東北一百四十里。遼北安州即後魏之安州，其故城即今博洛河

屯，詳見前卷三北魏安州條下。在豐寧縣境。金興州即元之大興州，其故城即今喀喇河屯，在灤平縣境。是

金之興州特改置於北安州之南境。利民自為遼縣，興化自為金縣。《一統志》原本曰：遼

置利民縣，金初廢為寨。承安五年建興州，復置利民縣屬焉，泰和四年又廢。是利民縣

至金時復置而旋廢，與興州所治之興化縣本屬兩地，以興化為遼置，而以利民為金增置

者，乃《金志》之誤。

又按：遼北安州，疆域頗廣。金初用兵，自克東京、上京至進取中京，史載攻下郡

縣不一。及宗翰破北安州後，與都統杲會於奚王嶺，分道追遼主於鴛鴦灤。鴛鴦灤在今宣化府、張家口外牧廠境內，為金

時撫州集寧縣地，亦名集寧海子。中間數百里，別無攻圍郡縣之事。知今承德府西境，及豐寧縣、灤平縣之東

境，皆北安州地也。至《遼志》於北安州下稱晉為馮跋所據，馮跋即北燕主。考承德府